

INGURUMENA. Hilaren 20an, larunbata, manifestazioa deitu dute



Boroako zentralaren aurkako kartelak herritarren eskuetan, Zornotzako udal batzar batean.

Boroako zentralari buruzko erreferenduma debekatzea salatu du Zornotza Bizirik-ek

EAJk erreferenduma galarazteko agertu duen asmoa «antidemokratikoa» dela dio

G. Agirre | BILBO

Zornotzako Boroa auzoan eraikitzeko den ziklo konbinatuko plantari buruz erreferenduma egitea galarazteko EAJk agertu duen asmoa «fashista, antidemokratikoa eta lotsagarria» dela salatu zuen Zornotza Bizirik Plataformak, atzo.

Joan den irailaren 13an, Begoña Azarloza Zornotzako alkateak Boroako zentralaren proiektu eztabaidatsuari buruzko erreferenduma deitu zuen urtarrilaren 20rako. Hurrengo egunean, Bizkaia Buru Batzarra (BBB) erreferendumen kontra agertu zen, eta deialdiaz berriro hausnartzea eskatu zion alkate jeltzaleari.

Iragan larunbatean, bestalde, ESB enpresa irlandarrak sustatzen duen plantari buruzko erreferenduma galarazteko, eta proiektuak aurrera egiteko «bere esku dagoen guztia» egingo duela iragarri zuen Iñigo Urkullu BBBeko lehendakariak. Adierazpenok, Bizkaiko EAJko 250 kargurekin egindako bilerraren ostean egin zituen.

Ramon Dudagoitia Zornotza Bizirik plataformako eledunak

ALKATEA

Begoña Azarloza isilik

Begoña Azarloza Zornotzako alkateak ez du erreferendumen auziari buruz adierazpenik egin nahi. Joan den irailaren 13an erreferenduma iragarri zuen, eta hurrengo egunean, BBB deialdiaren kontra agertu zen publikoki. Geroztik, Azarlozak uko egin dio auziaz hitz egiteari.

gogor salatu zuen Urkulluk iragarritako asmoa, alegia, «plantaren aurka dauden Zornotzako EAJko milaka militante begi onez» ikusten duten deialdia «debekatzea».

Manifestazioa hilaren 20an

«Zentral termikoaren kontra egin ditugun manifestazioetan EAJ alderdiko milaka eta milaka lagunek hartu dute parte, eta ziur gaude hilaren 20an egingo dugun manifestazioan ere bertan izango direla», gaineratu zuen plataformako berbadunak.

Zornotza Bizirik-eko partaideak gogoratu zuenez, platafor-

mak plantaren kontrako ia 16.000 sinadura jaso ditu, eta sinatzaile horietatik %80 baino gehiago zornotzarrak dira. Hori dela eta, Azarloza alkateak plantaren eraikuntza eta jarduera baimenak ezin dituela eman adierazi zuen Dudagoitiak.

Begoña Azarloza alkateak Zornotza Bizirik plataforma «aintzat hartu ez eta bertako ki-deei ihes egiten» diela salatu zuen Dudagoitiak. Era berean, urtarrilaren 20ko erreferendum deialdia mantentzen duen edo ez, oraindik ez duela argitu ere kritikatu zuen.

«Iruzur egin digute, gauza bat iragartzen dute eta gero atzera egitzen dute. Baina, alkateak kontrakoa esaten ez duen bitartean, guretzat, urtarrilaren 20rako erreferendum deialdiak bere horretan jarraitzen du», gaineratu zuen.

Bestalde, Eusko Jaurlaritzaren E-2005 plangintza garatzeko hainbat energia proiektu soberan daudela uste du Dudagoitiak. Izan ere, azaldu zuenez, «ziklo konbinatuko planten bitartez, guztira, 855 megawatt argindar sortzea aurreikusten du egitarau horrek. Baina, gaur egun proiektu diren planta guztiak martxan jarritz gero, 2.800 megawatt inguru ekoiztuko lirateke».

'BEHI EROAK'

Nafarroan seigarren kasua agertu da, eta Zaragozatik baieztatu zain daude

Erredakzioa | IRUÑEA

Nafarroako Gobernuak atzo jakinarazi zuenez, *behi eroen* gaitzak jotako seigarren kasua atzeman zen joan den astean, mendialdeko baserri batean; eta orain Zaragozako laborategiak baieztatzea falta da soilik.

Abelburua ia zazpi urtekoa zen, eta erditzen hil zen. Laginak hartu eta berehala animalia gorpua desegin zuten.

Egindako lehen analisisan atzeman ziren behi entzefalopatia espongiformea gai-

xotasunaren arrastoak, eta bigarren analisiak ere baieztatu egin zuen diagnosia.

Nuria Iturriagoitia Nafarroako Gobernuako eledunak adierazi zuenez, Abeltzaintza Departamentuko albaitaritzak zerbitzuek atzo bertan jakinarazi zioten abeltzainari berria, eta abereak mugitzea debekatu diote. Orain, baserriarrak erabaki beharko du abere talde osoa desegin edo bakarrik parte bat.

Orain arte Nafarroan atzemandako kasu guztiak mendialdekoak izan dira, eta urte batzuetakoak.

ERASOA

'Camille' hartzak beste 15 ardi akabatu ditu Izaban

Erredakzioa | IRUÑEA

Nafarroako Erronkarin dabilen *Camille* hartz emea negurako prestatzen ari da. Herenegun, Izaban, eraso egin eta hamabost ardi akabatu zituen, eta asko zaurituta utzi.

Hau da *Camille* hartzaren 17. eraso, martxoan neguko loalditik esnatu zenez geroztik; eta 44 behi akabatu ditu urte osoan. Iaz baino gehiago.

Oraingo honetan Joaquín Garde artzainaren artaldeari eraso dio. Izabako artzain honek berrogeita hamar ardi

galdu ditu aurten bakarrik, eta lehen erasoak gertatu zirenetik 118 ardi hil dizkio hartzak. *Camille* herri honetan, hain zuzen ere, egin ditu eraso gehienak.

1998tik Nafarroako Gobernuak 27,5 milioi pezeta ordaindu ditu hartzaren erasoengatik, gehienak 2000. urtean. Orduan 35 ardi hilda gertatu ziren, eta bost zaurituak.

Aurten, eta Ingurumen Departamentuak emandako datuen arabera, zazpi abeltzainek jasan dute *Camille*-ren eraso, larrietakoa asteburu honetakoa.

EGURALDIA

Irailean ohi baino euri gutxiago egin du Nafarroan

Europa Press | IRUÑEA

Joan den irailean ohi baino tenperatura baxuagoak izan ziren eta ohi baino euri gutxiago egin zuen Nafarroan, Gobernuak Nekazaritza, Abeltzaintza eta Elikadura Zerbitzuak egindako txostenaren arabera.

Iraileko lehen hiru asteak lehorrak izan ziren, nahiz eta euria egin zuen Kantauri ertzeko haranetan. Azken astean, baina, udazkeneko egoera ohikoa jazo zen: Atlantikotik Europara iritsitako borrasak eragindako egoera, hain zuzen ere. Irailaren

21 eta 24 bitartean euria egin zuen ia Nafarroa osoan.

Bestetik, nabarmentzekoa da oso lehorra izan zela iraila Pirinioetan eta Kantauri ertzeko haranetan. Normalean egin izan duenaren erditik behera egin baitzuen euria. Iruñerri eta Erriberako Garaian, ohi baino euri gehiago egin zuen.

Hala ere, oso hotza izan zen hilabetea, eta minimoak 0 eta -2 gradu artean izan ziren zenbait egunetan.

Hilabetea amaitutakoan, Nafarroako urtegien ur edukia %14raino jaitsia zen, iturri berberak esan dutenez.